

Tiwei Jon Kewisik - 1

Menmen me tiwei ik

Jon katip mit menmen hirak epei kirem, emenmen hirak epei kementewem

1:1-4

Haiu mamises menmen me God hiram mire esi merhihe *1:5-2:29*

Him me nikerek ne God netike enikerek ne Seten *3:1-24*

Menmen me him yaaim metike him enum *4:1-6*

God hanhan haiu mit te haiu hanhanan *4:7-21*

Haiu mit kerek mises him me God haiu emaminin menmen enum me ti

5:1-21

Him mamkepai haiu mamu tipmain tipmain enum eik

1 ¹ Nipaa enum eik mitik hirak kire him kerek kakikepai haiu mamu tipmain tipmain enum eik, hirak kepu. Krais hirak Haai ke him ik. Haiu in ek epei memtau him mirak, haiu hiras mirek meteninwekhis. ² ^b Me wi God kewepyapir Krais, haiu mirek. Hirak kekepai te haiu mit miyapir emu tipmain tipmain enum eik. Haiu epei mirek haiu mewepyapirek metpiyek. Nipaa hirak kau ketike Haai kirak ere hirak keriuwetek kan ti hirak kewepyapirek. ³ Menmen haiu mirem haiu metpiyem, te yi yaitikewei haiu mamtike God mamu han kiutip mamir ke haiu hiras epei metike God Haai ketike Nikan kirak Jisas Krais haiu mau han kiutip. ⁴ Haiu mewisi tiwei ik te yi eiyirtei menmen im werek werek, yi eitikewei haiu emu han yaaik wisenuk.

Haiu emises menmen yaaim me God

⁵ Krais ketpei him im te haiu metpiyem. God hirak kire wepni. Hirak ap kipre witaan au. ⁶ Haiu matip haiu metike God mau han kiutip, te haiu miriak menmen enum, hiram mar ke mitik keke ti ke witaan toto. Haiu memipin ap te mises him yaaim me God mar ke mitik kerek keke ti

^a 1:1 Jo 1:1-2, 4; 1Jo 2:13-14 ^b 1:2 Jo 1:14 ^c 1:2 Jo 1:14 ^d 1:4 Jo 16:24 ^e 1:5 1Ti 6:16; Je 1:17 ^f 1:6 1Jo 2:4; Jo 3:21

ke wepni au. ⁷Te haiu miriak menmen yaaim mar ke God kiriakem, haiu hiras mau han kiutip, hemkre me Nikan kirak Jisas nipaa mewen hiram mamisak menmen enum maiu yapirwe mamno, haiu han kaiu yaaik prar prar. ⁸Te haiu matip haiu miriak menmen enum au, haiu memipin hiras him yaaim me God mau mekre han kaiu au. ⁹Haiu mewepypir menmen enum haiu miriakem, God hirak yaaik kakises menmen nipaa ketpaiyem, hirak katip kakisak menmen enum haiu miriakem, te haiu han kaiu yaaik prar prar. ¹⁰Haiu matip haiu ap miriak menmen enum au, hiram mar ke haiu matip God hirak kemipin. Haiu matip haiu miriak menmen enum au, him yaaim mirak mau mekre han kaiu au.

Krais hirak kaiu yaaik kekepai

2 ¹Nai yinan yaain, yi yire nikerek nai, hi hewisi him im te yi ap eiriak menmen enum au. Keimin ke haiu mit hirak kiriak menmen enum, Jisas Krais hirak mitik yaaik hirak kakikepik. Hirak kau ketike God, hirak kitiwekhi ke mitik ik. ²Jisas kewet God hirekes hirak kaa kentar nu tentarakit kewenin Haai kirak han te hirak han enuk keriuwai me menmen enum haiu miriakem au. ³Haiu mises him mirak te haiu merteiyek werek werek, haiu nirak. ⁴Mitik kiutip katip kar ik: “Hi hertei God werek werek hi kirak,” te hirak ap kises him mirak au, te mitik ik kemipin. Him me God ap mau mekre han kirak au. ⁵Keimin kises him me God, hirak hanhanek wisenuk. Mar im haiu mertei haiu mises God werek werek. ⁶Keimin katip hirak kises God te hirak ekriak menmen emir ke nipaa Krais kiriakem.

Keimin hanhan nirak yinan, hirak kises him me God

⁷Nai yinan yaain, him im hi hewisiyem hiram me petepin kerekek au. Me nipaa ein hiram mepu. Him im nipaa yi yinin yises God yi yemtewem. ⁸Au, him im hi hewisiyem hirak Krais kiriakem, in ek hiram mewep wisenum. Nipaa Krais kiriakem te in ek yi yisesim. Him im matip mar ik: Haiu hanhanan naiu yinan. Menmen enum hiram mire mitik keke ti ke witaan, hiram mau han kaiu, te hiram mamno mamit. Menmen yaaim mar ke mitik keke ti ke wepni hiram mekrehir miram. ⁹Keimin katip hirak kises him me God te hirak han enuk keriuwe kirak yinak, hirak ap kises him me God au. Hirak kire mitik hak ap kenke si au kitet yayiwe ke witaan kepno. ¹⁰Keimin hanhan kirak yinak, hirak kises him me God. Hirak kire mitik kitet yayiwe ke wepni hirak kir yayiwe werek

^s 1:7 Ais 2:5; Hi 9:14; Rev 1:5, 7:14 ^h 1:8 Sam 32:5; Pro 28:13 ⁱ 2:1 Hi 7:25, 9:24
^j 2:2 1Jo 4:10, 14; Jo 1:29, 11:52; Kl 1:20 ^k 2:4 1Jo 1:6, 8 ^l 2:5 Jo 14:21, 23; 1Jo 4:12, 17, 5:3 ^m 2:6 Jo 13:15 ⁿ 2:7 2Jo 5-6; 1Jo 2:24, 3:11 ^o 2:8 Jo 1:9, 13:34; Ro 13:12
^p 2:9 1Jo 3:10, 15, 4:20 ^q 2:10 Ro 14:13; Jo 11:9

werek ap te kakikenpet tip mamɨwɨk kakinkewɨn au. ¹¹Keimɨn han enuk kerɨuwe kirak yɨnak, hirak kertei menmen me God au. Hirak kises menmen enum kar ke mitik kitet yayiwe ke witaan. Witaan wi mekrewek nanamɨr (o naan) te hirak ketari yayiwe hirak kitetim. ¹²Nikerek nai, hi hewisi tiwei ik hentar menmen enum yi yiriakem God epei kesakem. Hirak kesakem kentar menmen yaaim nipaa Jisas kiriakem. ¹³Hi hewis tiwei ke yi haairer hentar yi yertei hirak keimɨn kepu nipaa ere in. Hi hewis tiwei ke yi pipep hentar him me God mau han ki yi yinin Seten. ¹⁴Nikerek nai hi hewisi tiwei ik hentar yi yertei God Haai. Hi hewis tiwei ke yi haairer hentar yi yertei hirak God kerek kepu nipaa ere in. Hi hewis tiwei ke yi pipep hentar yi manpenun yeit, him me God mau han ki yi yinin Seten.

Yi ap hanhan menmen enum me ti

¹⁵Yi ap hanhan eiyises menmen enum mit niriakem o menmen enum me ti au emit! Keimɨn hanhan menmen enum me ti, hirak ap hanhan God Haai au. ¹⁶Menmen me ti hiram mar im: Menmen enum me ti mit hir hanhanem nanisesim, menmen mit nirem hir hemkre menepam nerɨuwerem, mit han kitet hiras netenen menmen yapirwe ninin mit han. Menmen im hiram ap menmen me God au. Hiram menmen me ti keremem. ¹⁷Menmen me ti metike menmen enum me hemkre menepam merɨuwerem mamno mamɨwaank mamit, te neimɨn niriak menmen God hanhan hir nanisesim, hir nanu nanit tipmain tipmain enum eik.

Mit nepan ne Krai newepyapir hiras

¹⁸Nikerek nai yaain, wi epei man menep te mitik enuk kepan kinapen Krai hirak kaknen. Mit yapirwe nepan ne Krai epei newepyapir hiras te haiu mertei wi epei man menep. ¹⁹Mit han ne mit in nipaa nau netike haiu mit ne weiwik me God. Te in ek hir ninaiwirai nen nentar hir ap nises him me God au. Hir nipaa nises him mirak werek te hir wen netikewei mepu in. Hir epei ninaiwirei nen te haiu mertei hir ap nises God nar ke haiu mit in misesik au. Hir nemipɨn. ²⁰God kesɨuwe Himɨn kirak Yaaik kan kekere han ki te yi yapirwe yertei him mirak werek werek. ²¹Hi hewisi tiwei ik hentar yi ap yertei him yaaim me God au. Hi hewisiyek hentar yi yertei him mirak yaaim. Keimɨn ap kises him mirak hirak kemipɨn. ²²Hirak keimɨn? Hirak mitik kerekkek katip Jisas hirak ap Mitik Krai nipaa God kehimitanek au. Mitik ik hirak kepan ke Krai kerekkek. Hirak keweikin sip kewet God Haai ketike Nikan kirak. ²³Mit kerek natip Jisas hirak

^r 2:11 Jo 11:10; 12:35 ^s 2:12 1Ko 6:11 ^t 2:13 1Jo 1:1; Jo 1:1 ^u 2:15 Ro 8:7; Je 4:4
^v 2:16 Ro 13:14; 1Pi 2:11 ^w 2:17 1Ko 7:31; Mt 7:21 ^x 2:18 1Pi 4:7; Mt 24:5, 24; 2Jo 7
^y 2:19 Ap 20:30; 1Ko 11:19 ^z 2:20 1Ko 2:15; 1Jo 2:27 ^a 2:22 1Jo 4:3; 2Jo 7 ^b 2:23 Jo
5:23, 15:23; 1Jo 4:15, 5:1; 2Jo 9

ap Nikan ke God au, God Haai kau ketikeri au. Mit han kerek natip Jisas hirak Nikan ke God, God Haai kau ketikeri.

God Himin Yaaik keteiknai him yaaim

²⁴Te yi wen eiyises menmen yi nipaa yemtewem hiram emikre han ki. Hiram mekre han ki te God Haai ketike Nikan kirak hirakit tatpau tatpitikewi. ²⁵^eNipaa Kraiskatip kakises him im: Hirak kakikepai haiu mamu mamit tipmain tipmain enum eik. ²⁶Hi epei hewisi tiwei ik hetpi me mit hir nepakin Jisas hir enun nemipin nanri han ki. ²⁷^dNipaa hirak keweti Himin kirak Yaaik kau han ki te yi ap eiyithis mit han hir nanteikni mekam yaaim o mekam enum au. God Himin Yaaik hirekes kerekek kakteikni menmen yapirwe. Him mirak yaaik kemipin au. Menmen Himin kirak Yaaik keteikniyem, yi eiyisesim te yi eiyises Kraisk. ²⁸^eTe in ek, nikerek nai, yi eiyisesik te maain wi hirak kaknen kakwepyapir hirekes, haiu ap yink enuk mamneinik mamno mamsawin au. Haiu mamirp ninaan mirak. ²⁹^fYi epei yertei God hirak mitik yaaik, te neimin niriak menmen yaaim, yi yertei hir nikerek ne God.

In ek haiu nikerek ne God

3 ¹^gYi eiyimtau. God Haai hanhanai wisenum, te hirak kenewai haiu nikerek nirak. Him im yaaim. Haiu nikerek nirak. Mit nises menmen me ti hir nipaa ere in ap nertei God au. Markeik te hir netari menmen haiu misesim au. ²^hNai yinan yaain, in ek haiu epei mire nikerek ne God. Maain hirak Jisas kaknen haiu mamweikin his mamir ke hirak mamintar haiu mamirek. Te in ek haiu metari maain menmen im mamre mekam au. ³Mit neimin hir nemerir menmen im mamnen, hir hekrit hekrit ap niriak menmen enum te hir han yaaik prar prar nanu nanir ke Kraisk hirak kepu. ⁴Neimin hir niriak menmen enum, hir neweikin sip newet him me God. Him im hiram yaaim mentar menmen enum hiram meremir him me God. ⁵ⁱYi yertei Kraisk epei kan kesak menmen enum haiu miriakem. Menmen enum mekre han kirak au. ⁶^jTe neimin nises Kraisk, hirak kau kekere han kir te hir ap niriak enum au. Neimin niriak enum hekrit hekrit hir netari Kraisk, hir nisesik au. ⁷^kNai yinan yi naanempre hiras. Yi ap eiwis mit han hir nanmitipin au emit! Keimin hirak kiriak menmen yaaim hirak yaaik kire Kraisk. ⁸^lKeimin kiriak menmen enum hirak kises han ke Seten. Hirak kises han ke Seten kentar nipaa ere in Seten kiriak enum. Nikan ke God Jisas kan kewepyapir hirekes te hirak kakiwaank menmen enum Seten kiriakem.

^c 2:25 Jo 3:15, 6:40 ^d 2:27 Jo 14:26, 16:13 ^e 2:28 1Jo 3:2, 4:17 ^f 2:29 1Jo 3:7, 10 ^g 3:1 Jo 1:12-13, 16:3 ^h 3:2 2Ko 3:18; Fl 3:21 ⁱ 3:5 2Ko 5:21; 1Pi 2:22-24; 1Jo 2:2
^j 3:6 Ro 6:1-2, 14 ^k 3:7 1Jo 2:29 ^l 3:8 Jo 8:44

^{9m}Neimin hir nikerek ne God, hir wen niriak menmen enum yapirwe au. Menmen iuwe me God mekre han kir. God hirak Haai kir te hir ap nanriak menmen enum taau. Hir nikerek ne God te hir wen nanriak menmen enum au emit! ¹⁰Mar im haiu mertei neimin nikerek ne God, neimin au hir nikerek ne Seten. Neimin niriak menmen enum, hir ap nikerek ne God au. Neimin ap hanhan nir yinan, hir ap nikerek ne God au.

Yi hanhan ni yinan

¹¹Him im hi hetpiyem hiram menmen nipaa yi yinin yises God yi yemtewem. Hiram im: Yi hanhanan. ¹²Haiu ap han enuk mamriuwe nau yinan mamir ke mitik niuk mirak Ken au. Hirak ke Seten hirak kenep nikik kirak kaa. Kenmak te hirak kakip? Hirak kakip kentar menmen hirak kiriakem hiram enum, menmen nikik kirak kiriakem hiram yaaim. Hirak han enuk keriuwerek te hirak kakip. ¹³Nai yinan, yi ap han kekrit eyintar mit ap nises God hir han enuk neriuwi au emit! ¹⁴Haiu hanhan nau yinan te haiu mertei han kiau kaa keit me menmen enum me ti. Han kiau kekrit kepu me menmen me God. Neimin ap hanhan nir yinan, han kir wen kises menmen enum me ti. ¹⁵Keimin han enuk keriuwe kirak yinak, hirak kire mitik enuk kenepep mit. Yi yertei mitik kar ik han kirak ap kises menmen me God, hirak ap te kaku kaktikerek tipmain tipmain enum eik au. ¹⁶Nipaa Jisas kaa kentirai haiu mit. Mar im hirak keteiknai hirak han teweninai. Te haiu emises menmen Jisas kiriakem. Haiu han etwenin nau yinan, haiu ap te minain mami mamkepi au. Haiu mamkepi keriyen. ¹⁷Keimin kau ti ik keit menmen yapirwe te hirak kertei kirak yinak kepu weinik, hirak kewen han kirak kakikepik ap kakwetiwek menmen, kenmak te mitik ik hirak katip hirak hanhan God kises him mirak? Taauye! ¹⁸Nai yinan, haiu ap emtip weinim haiu hanhan mit keriyen au. Haiu emkepi emteiknor haiu hanhani iuwe.

Mit nises him me God ap yink enuk nanirp ninaan mirak

¹⁹Haiu mamkepi mamir im te haiu mertei haiu mises him yaaim me God. Han kiau ketpai haiu enun me menmen te haiu ap yink enuk me ninaan me God au. Menmen mar ik God hirak ²⁰Iuwe enuk kinin han kiau kertei menmen yapirwe. Hirak kertei haiu misesik werek werek te haiu enun au emit! ²¹Nai yinan yaain haiu han kiau ap ketpai haiu enun au, haiu merp ninaan me God haiu han tokik mamirp mamit.

^m 3:9 1Jo 5:18 ⁿ 3:11 Jo 13:34 ^o 3:12 Jen 4:8 ^p 3:13 Mt 5:11-12; Jo 15:18-19 ^q 3:14 Jo 5:24; 1Jo 2:11 ^r 3:15 Mt 5:21-22; Rev 21:8 ^s 3:16 Jo 13:1; Ga 1:4; 1Te 2:8 ^t 3:17 Diu 15:7 ^u 3:18 Je 2:15-16 ^v 3:21 Hi 4:16

22 Haiu mitehi God me menmen, hirak kakwetaiyem mentar haiu mises him mirak, haiu miriak menmen yaaim hirak hanhan haiu miriakem. 23^wNipaa God ketpai him im. Haiu emises him me Nikan kirak Jisas Krai, haiu hanhanan. 24^xKeimin kises him me God kerekek, hirak ketike God tau han kiutip. God Himin Yaaik kirak kerek hirak kewetaiyek, hirak keteiknai God Haai kau kekre han kaiu.

God Himin Yaaik ketike himin enum memipin

4 1^yNai yinan, mit yapirwe newepyapir him enum me memipin hir epei nen nerer wit wit. Yi ap eyimtau him me mit yapirwe hir natip God Himin Yaaik kau ketikeri au. Yi han ekitet werek him yapirwe mit netpim te yi eyirtei him mir hiram me herwe o hiram me God. Him me mit in hiram me herwe te yi eiweikin sip eiwetiwem. 2^zMar ik yi eyirtei God Himin Yaaik kau ketikewi. Keimin katip God keriuwet Jisas Krai hirak kan keweikin his kire mitik, hirak God Himin Yaaik kau ketikerek. 3^aKeimin ap katip ke Jisas kar ik, “herwe kau ketikerek,” hirak ap ke God au. Herwe (o tipir) hirak ke mitik kepan ke Krai. Yi epei yemtau maain hirak kaknen. In ek menmen mirak enum epei man. 4^bNai yinan yaain, yi ne God te yi epei yinini yentar hirak iuwe kerek kekre han ki hirak kinin hirak kerek kekre han ke mit ne ti enun nemipin. 5^cMit enun nemipin hir ne God au. Hir ne ti keriyen. Menmen hir netpim hiram me ti te mit ne ti nemtewem nisesim. 6^dTe haiu mit ne God. Neimin nertei God hir nemtau him maiu. Neimin au, hir nemtau him maiu au. Emir im haiu mertei God Himin Yaaik katip mit him yaaim, haiu mertei herwe au matip mit him enum me memipin.

God hirekes Haai ke han teweninai haiu mit

7^eYi nai yinan, haiu hanhanan. Menmen im me haiu hanhanan hiram menmen me God keremem. Keimin hanhan nirak yinan, hirak nikan ke God, hirak kerteiyek werek. 8^fKeimin han tewenin nirak yinan au, hirak ap kertei God kentar hirak God hirekes hirak Haai ke han tewenin mit. 9^gGod hirak keteiknai hirak hanhanai kar ik: Hirak kesiuwe Nikan kirak kiutip kerekek hirak kan kekepai te haiu mamu werek werek. 10^hMenmen me han teweninem hiram mar im. Haiu han tewenin God im em ap minin meteikin mit em au. God kinin hanhanai kesiuwe Nikan kirak te hirak kesak menmen enum haiu miriakem, menmen im meteikin mit menmen me han tewenini. 11ⁱYi nai yinan, menmen mar

^w 3:23 Jo 6:29, 13:34 ^x 3:24 Ro 8:9; 1Jo 4:13 ^y 4:1 Mt 7:15; 1Jo 2:18; 2Jo 7; 1Te 5:21
^z 4:2 1Ko 12:3 ^a 4:3 2Jo 7; 1Jo 2:18 ^b 4:4 1Jo 5:4-5; Mt 12:29 ^c 4:5 Jo 15:19 ^d 4:6 Jo 8:47 ^e 4:7 1Jo 2:29 ^f 4:8 1Jo 4:16 ^g 4:9 Jo 3:16 ^h 4:10 Ro 5:8-10; 1Jo 2:2 ⁱ 4:11 Mt 18:33

im God keteiknai hirak han teweninai, te haiu hanhanan. ¹²JHaiu ap nipaa mitik keiyak kir God au. Haiu hanhanan te God kau kekre han kaiu haiu han teweninek werek werek. Haiu mertei hirak han teweninai. ¹³^kHaiu mertei haiu metike God haiu mau han kiutip mentar hirak nipaa kewetai Himin kirak Yaaik ketikewai kepu. ¹⁴^lHaiu epei mir Jisas te haiu mewepyapir him im: God Haai kesiuwe Nikan kirak te hirak kakikaap mit miyapir niutip niutip me ti ik e, kakremir menmen enum hir niriakem. ¹⁵^mKeimin katip Jisas hirak Nikan ke God, hirak ketike God tau han kiutip. ¹⁶ⁿGod hirekes Haai ke han tewenin, te haiu mertei hirak han teweninai. Mitik kerek han tewenin mit, hirak ketike God tepu han kiutip. ¹⁷^oHaiu mertei God hanhan haiu han tewenin mit werek werek. Haiu miriakem te maain wi God skelim mit, haiu ap mineinik au. Menmen haiu miriakem in, hiram mire menmen nipaa Krai kiriakem. ¹⁸Keimin kertei God han teweninek, hirak ap kineinik au. Keimin han tewenin God werek werek hirak ap kinaain menmen au. Mitik kinaain kenmak? Hirak kinaain kentar hirak God kakiwaankek me menmen enum nipaa hirak kiriakem. Keimin kinaain God, hirak han tewenin God ketike mit werek werek au. ¹⁹Haiu han tewenin God ketike mit mentar nipaa enum eik God kinin han teweninai, haiu mikaru han tewenin nau yinan. ²⁰Mitik hak katip kar ik: “Hi han tewenin God,” te hirak han enuk keriuwe kirak yinak, hirak mitik enuk kewenin him. Haiu mit ap mir God au. Keimin kir kirak yinak te hirak ap han teweninek au, kakirkeik te hirak han tewenin God kerek hirak ap kirek wen au? Hirak han enuk keriuwe kirak yinak, hirak han tewenin God taauye! ²¹^pHim im haiu metpiyem meke him me Krai man. Hiram mar im: Keimin han tewenin God hirak han tewenin kirak yinak.

Mit nises him me God naninin menmen enum me ti

5 ¹^qNeimin han kitet Jisas hirak mitik God kehimitanek kakikaap haiu mit, hir nire nikerek ne God. Neimin han tewenin God Haai, hir han tewenin Nikan kirak. ²Haiu han tewenin God haiu mises him mirak te haiu mertei haiu han tewenin nikerek nirak. ³^rHaiu mses him me God te haiu han teweninek. Haiu han teweninek te him mirak hiram menipai han enuk au. ⁴^sHaiu han enuk au mentar haiu nikerek ne God te haiu maminin menmen enum me ti. Mamirkeik te haiu maminin menmen enum me ti? Haiu mises him me God hirak kekepai haiu mamininem. ⁵^tNeimin naninin menmen enum me ti? Mit kerek han kitet Jisas hirak Nikan ke God kerekek hir keriyen naninin menmen enum me ti.

^j 4:12 Jo 1:18; 1Jo 2:5-6 ^k 4:13 2Ko 1:22; 1Jo 3:24 ^l 4:14 Jo 3:17 ^m 4:15 1Jo 5:5 ⁿ 4:16 1Jo 4:8 ^o 4:17 1Jo 2:28 ^p 4:21 Mt 5:44-45; Mk 12:29-31 ^q 5:1 1Jo 4:15
^r 5:3 Jo 14:15, 23-24; 2Jo 6; Mt 11:30 ^s 5:4 Jo 16:33 ^t 5:5 Ro 8:37; 1Jo 4:4

God kewepyapir menmen me Kraiss werek werek

⁶“Haiu mertei Jisas hirak Nikan ke God kentar nipaa God keteiknaiyek me wi mitik Jon ketenen Jisas kikirek keriuwe tipar. Hirak pike keteiknaiyek me wi Jisas kaa hemkre mirak mewen. God Himin Yaaik hirak Haai ke him yaaim. Hirak kempin au. Hirak katip Jisas hirak Nikan ke God. ⁷⁻⁸”Menmen wikak meteiknaiyek. God Himin Yaaik keteiknaiyek. Menmen mitik Jon kiriakem wi kerek nipaa hirak ketenen Jisas kikirek keriuwe tipar hiram meteiknaiyek. Im metike haiu han tewenin wi Jisas kaa hemkre mirak mewen. Menmen wikak im meteiknai menmen miutip me Jisas. Hiram matip Jisas hirak Nikan ke God. ⁹”Haiu memtau him mit netpaiyem haiu misesim. Haiu memtau him me mit te haiu mamimtau him God ketpaiyem me Nikan kirak mentar him mirak minin him me mit. ¹⁰”Te neimin nises him me God hir nertei nekre han kir him me God hiram yaaim. Nipaa God ketpim me Jisas kar ik: “Hirak Nikan kai.” Neimin ap nises him me God hir ap nemtau him nipaa God ketpim me Nikan kirak. Mit in natip God kempin. ¹¹ God ketpai him im e. Hirak epei kekepei haiu mamu tipmain tipmain enum eik. Hirak kekepei keriuwet Nikan kirak kan kaa kentar nu tentarakit kesak menmen enum haiu miriakem. ¹²”Keimin ketike Jisas tau han kiutip, hirak kaku tipmain tipmain enum eik. Keimin au, ap te kaku kaktikerek au.

Haiu emirtei haiu mamu tipmain tipmain enum eik

¹³”Hi hewisi tiwei ik te yi mit kerek yises Nikan ke God yi eiyirtei yi yayu tipmain tipmain enum eik. ¹⁴”Haiu ap yink enuk te haiu mitehi God me menmen mentar menmen im. Haiu mertei haiu mitiwekhi me menmen mises han kirak, hirak kakimtau him maiu. ¹⁵ Haiu mertei hirak kakimtau menmen haiu mitiwekhiyem, te haiu mertei hirak kakweteiyem. ¹⁶”Keimin kir kirak yinak kiriak menmen enum ap te mamriak hirekes kaki, hirak ekitehi God te hirak kakikepik te hirak kaku werek werek. Menmen ham mitik kiriakem hiram mamriakek kaki. Keimin kakriakem hirak kaki, te yi ap eiyitehi God ke mitik ik au emit! ¹⁷ Menmen enum yapirwe mit niriakem meremir him me God. Te menmen enum im hir niriakem hiram mamnip God han enuk waswas te hirak kakriuwet mit nanino si waswas au. ¹⁸”Haiu mertei keimin hirak Nikan ke God hirak kiriak menmen enum yapirwe au. God Nikan kirak hirak naanmipre mitik kar ik te Seten kakrekyiwek enum au. ¹⁹”Haiu

^u 5:6 Jo 1:29-34; 1Jo 1:7 ^v 5:7 Jo 15:26 ^w 5:9 Jo 5:32-37, 8:18 ^x 5:10 Ga 4:6 ^y 5:12 Jo 3:36 ^z 5:13 Jo 20:31 ^a 5:14 Jo 14:13, 16:23; 1Jo 3:21-22 ^b 5:16 Mt 12:31 ^c 5:18 1Jo 3:9; Jo 17:15 ^d 5:19 1Jo 4:6

mertei haiu ne God te mit han yapirwe nau ti Seten naanmipror hir nises him mirak. ²⁰eHaiu mertei Nikan ke God epei kan kekepei te haiu mertei God kiutip en kerekek. Ap keiyak au. Haiu metike God kiutip en kerekek, haiu mau han kiutip en kerekek kepu hirak kekepai, haiu mamu tipmain tipmain enum eik. ²¹fNai yinan, yi eiweikin sip eiwet tipir.

Mepir keremem

^e 5:20 Jo 17:3 ^f 5:21 1Ko 10:14